

## Thuto Serapeng Sa Edene



---

### SABATHA THAPAMA

#### **Bakeng sa Thuto ea Beke ena Bala:**

*Gen. 2:7–23; Gen 3:1–6; 2 Petr. 1:3–11; 2 Petr. 2:1–17; Bahe. 13:7, 17, 24.*

#### **Temana ea Khopolo:**

“Bona, Molimo O phahamile ka matla a oona; na moruti o teng ea kang Oona?” (Jobo 36:22).

**B**ongata ba baithuti ba Bibe le tseba pale ea Genese 1 -3 le baphetoa ba eona: Molimo, Adama, Eva, manyeloi, le noha. Sebaka ke serapa se setle paradeising e bitsoang “Edene.” Moralo oa eona o bonahala o latellisa liketsahalo hantle. Molimo O oa hlola. Molimo O laela Adama le Eva. Adama le Eva ba etsa sebe. Adama le eva ba lelekoa Edeneng. Leha ho le joalo, ho shebela likhaolo tse qalang Genese haufi, haholo-holo ka mahlo a thuto, ho ka tlisa chalimeho e fapaneng baphetoeng, sebaka le nako, le paleng.

“Leano la thuto le thomehileng qalong ea lefatše le ne le lokela ho ba lona bathong bohle le melokong eohle. E le tlhaloso ea metheo ea lona, sekolo seo eleng mohlala se ile sa theoa Edeneng, lehaeng la batsoali ba rona ba pele. Serapa sa Edene e ne e le phapusi ea thuto, tlhaho e ne e le buka ea thuto, ’Mopi ka bo-Eena e ne e le tichere, ‘me batsoali ba batho bohle e ne e le barutoana.”—Ellen G. White, *Education*, leq. 20.

Morena e ne e le mothehi, mosuoe-hlooho, le tichere ea sekolo sena sa pele. Empa joaloka ha re tseba, Adama le Eva ba ikhethela tichere e ’ngoe eaba ba ithuta lithuto tse fosahetseng. Ho ile hoa etsahala joang, hobaneng, le hore na ke sefe seo re ka ithutang sona ketsahalong ena ea pele-pele ea thuto e ka re thusang kajeno?

*\*Ithute Thuto ea Beke ena ho lokisetsa Sabatha sa, 3 Mphalane.*

## Sekolo Sa Pele

Leha re sa nahane ka serapa e le phapusi ea ho rutela, ho oa utloahala, haholo-holo serapa se kang Edene, se tletseng menono e sa silafatsolang ea tlholeho ea Molimo. Ho thata ho utloisisa, ho rona kajeno, libupuoana tse e-so oele, lefatšeng le e-so oele, tse rutoang ke 'Mopi oa tsona hantle, e be li tlameha li ne li ithutile hakae ka "phapusing eo ea borutelo"?

**Bala Genese 2:7–23. Ke sefe seo u se hlokomelang ka sepheo sa Molimo ha O hlola, O beha, le ho hira Adama?**

---



---

Molimo O entse monna le mosali ka setšoantšo sa Ona eaba o ba fa lehae le mosebetsi o utloahalang. Ha u sheba tse fuperoeng ke likamano tsa tichere le morutoana, u bona likamano tsa sebele. Molimo O ne a tseba bokhoni ba Adama hobane a 'mopile. O ne a ka ruta Adama, A tseba hantle hore Adama o tla elelloa bokhoni bohle ba hae. Molimo o file monna boikarabello, empa o ne a boetse a batla a be le thabo. 'Me mohlomong karolo ea ho mo fa thabo e ne e le ho mo fa boikarabello. Ka holimo ho tsohle, ke mang ea sa fumaneng khotsofalo-thabong, le e tsoang ho fuoeng boikarabello, e be u bo etsa ka botšepahi oa bo qeta? Molimo O ne a tseba pelo ea Adama, a tseba hore na o hloka hore a atlehe, eaba o fa Adama mosebetsi oa ho hlokomela serapa. "Eaba Jehova Molimo o nka motho, a 'mea tšimong ea Edene, ho e lema le ho e lebela." (Gen. 2:15). Ho thata ho rona ho ka nahana, kaha re itsebela lefatše la sebe feela, seo e ka bang mosebetsi o ne o se fupere le lithuto tseo ntle le khoao Adama a ithutileng tsona ha a ntse a sebetsa a hlokomela lehae la bona la Edene.

Ho Genese 2:19–23, Molimo o bopa liphoofole ho ba metsoalle ea Adama, o bile o bopa Eva ho ba mosali oa Adama. Molimo O ne a tseba hore Adama o hloka setsoalle le thuso ea molekane, eaba o bopa mosali. Molimo o boetse a tseba hore motho o ne a hloka ho ba likamanong tse tebileng le eena, eaba o boela a etsa sebaka sa likamano tsa lerato Edeneng ka hara serapa. Tsena tsohle li tiisa sepheo sa Molimo ha a hlola le lerato la hae ho batho. Hape, sekheong se sehoho pakeng tsa rona le Edene, ho thata ho ka nahana hore na e be ho ne ho le joang-leha e le ntho'e monate ho nahana ka sona, ha ho joalo?

**Leha re ritselitse thoko haholo le Edene, ntse re ka ithuta lithuto tlhahong. Tse ling tsa lithuto tseo ke life, re ka fumana molemo ho tsona joang ha re li hlalosa re li shebile ka leihlo la Mangolo?**

## Ho Kenoa

E 'ngoe ea thabo tse kholo-kholo ho tichere ke ho hlophisa phapusi ea ho rutela: ho maneha matlapa a manehang lithusa-thuto, ho hlophisa lisebelisuoa, le ho hlophisa phaposi hore e khahlehe. Ha re sheba pono ea Molimo ea kamoo phapusi e neng e le serapa sa Edene, re bona tsotello eo a e nkileng ho lokisa sebaka sa ho rutela bakeng sa Adama le eva. O ile a batla hore ba lika-liketsoe ke botle. Re ka nahana hore palesa e 'ngoe le e 'ngoe, nonyana, phoofolo le sefate li ne li fa Adama le Eva monyetla oa ho ithuta ka lefatše la bona le 'Mopi oa bona ka botebo. Leha ho le joalo ho na le phetoho ea tšohanyetso ho tloha ho Genese 2 ho ea ho Genese 3. Re entse pokello ea tsohle tse ntle tseo Molimo a li hlotseng ka sepheo se halalelang. Empa ho Genese 3:1 re boetse re buleha mahlo ka ho bona monyetla oa boikhethelo. Boteng ba noha e le “bohlale ho feta liphoofole tsohle tse teng” ho kheloha puoang eo esale e sebelisoa ho fihlela ha joale. Mantsoe a kang, “ho hotle haholo” le “ba se na lihlong” le “ho rateha” ke liphafi tse sebelisitsoeng ho hlalosa tlholeho ea Molimo likhaolong tse tlang pele. Joale, ka baka la bo teng ba noha, ho na le phetoho ea molumo. Lentsoe “bohlale” liphetoletse le ling le lefetoletse e le “mano.” Mahlo-tloha, se re bona ho hlahisoa ntho esa lokang ho seo, ho fihlela ha joale e sa le se phethahetse.

Ka hlakoreng le leng, Genese e hlahisa Molimo a le se fapaneng le ho ba “maqiti.” Molimo o hlakile ho hlaka malebana le litebello tsa hae ka bobeli bona bo serapeng. Rea tseba ho tsoa taelong ea Molimo ho Genese 2:16, 17 hore o fane ka molao o moholo oa mantlha hore ba o boloke, oona e ne e le oa hore ba se je sefate seo ho itsoeng ba se ke ba se ja. Sohle seo re ka se nkang paleng ena, ho hlaka ntlha e le 'ngoe: Adama le Eva ba bopiloe e le ntho tse nang le bolokolohi ba khetho ea boitšoaro, batho ba neng ba khona ho khetha ho mamela kapa ho se mamele. Ka hona, ho tloha qalong feela, le hona lefatšeng le e-so oele, re ka bona bonnete ba boikhethelo ba motho.

**Ho Genese 3:1–6, hlahloba lithetso tse sebelisitsoeng ke noha le tseo Eva a ileng a li pheta. U hlokomela eng ka litaba tseo noha e li fileng Eva? U hlokomela eng malebana le kamoo joale Eva a ileng a nka sefate sa tsebo ea botle le bobae kateng?**

---



---



---

Ho Genese 2:17, Morena o ile a bolella Adama hore ha a ka ja sefate sa tsebo ea botle le botle, o tla “shoa.” Ha Eva, ho Genese 3:4, noha e boela e arabela empa ka karabo e fapaneng le se builoeng ke Molimo. Ho bonahala e ka leha Eva a ne a rutiloe ka Molimo serapeng, h'a ka a nkela thuto tsena hloohong ho fapana le kamoo a ka beng a entse kateng, joalokaha re bona puo eo a e sebelisang.

## Ho Fosa Molaetsa

Jolokaha re bone maobane, ho sa natsoe taelo ea Molimo e hlakileng Eva-le puong ea hae feela- o ile a hlapolla seo a se rutiloeng. Leha a saka a loba tlhaloso ea seo Molimo a mo rutileng sona, ho' a hlaka hore h' a ka a se nkela hloohong haholo. Haho kamoo motho a ka feteletsang litla-morao tsa liketso tsa hae. Ka hona, ha Eva a kopana le noha, o ile a pheta, (empa eseng joalo hantle) seo Molimo a se buileng malebana le lifate tse ka serapeng (Gen. 3:2, 3). Ehlile, molaetsa ona o ne o se mocha ho noha. Noha e ne e tseba taelo ena 'me e ne e le malala-a-laotsoe ho e sotha, e ba ka ho etsa joalo o etsa Eva phofu ea ho hloka molato.

**Hlahloba Genese 3:4–6. Ntle le ho hanyetsa se builoeng ke Molimo ka kotlolloho, ke sefe hape seo noha e ileng ea se buoa, seo ho hlakileng, hore se ile sa atleha ho Eva? Ke metheo efe eo a ileng a nka monyetla ka eona?**

---



---



---

Ha noha e 'molella hore karolo ea taba tsa hae e fosahetse, Eva a ka be a ile a ea netefatsa taba ena ho Molimo. Bona ke botle ba thuto ea Edene: monyetla oa ho atamela tichere e khohohali eo barutoana ba neng ba e na le ona o tarakanya likelellonyana tsa rona ho ka o utloisisa kajeno. Leha ho le joalo, ho e na le ho baleha, ho e na le ho batla thuso e halalelang, Eva o amohela molaetsa oa noha. Ho amohela molaetsa oa noha o fetotsoeng ho qosa pelaelonyana ho Eva malebana le seo Molimo a leng sona le seo a ba boleletseng sona. Ho sa le joalo, Adama o re soahla! Ka hara boemo bo thata hona hoo. “Adama o ile a utloisisa hore motho oa hae o tlotse molao oa Molimo, o iphapanyelitse thibelo e le 'ngoe to! Eo ba neng ba e filoe ho beha botšepahi le lerato la bona tekong. Ho ile ha eba le ntoa e mahlonoko ka kelellong ea hae. O ile a itelela hore e be o lesitse Eva ho tsamaella moo a ke keng a 'mona. Empa joale ho se ho etsahetse, o tlameha ho arohana le eo e bileng mohloli oa thabo ea hae. Hobaneng a ka etsa tjee?” — Ellen G. White, Patriarchs and Prophets, leq. 56. Ka bomali-mabe, leha a ne a tseba botle le bobele, le eena a khetha hampe.

**Nahana ka kobiso e sebelisitsoeng mona: noha e itse haeba ba e ja sefate, “ba tla tšoana le Molimo” (Gen. 3:5). Empa Genese 1:27 e n’e sa re ba ne se ntse ba tšoana le Molimo? See se re rutang mabapi le kamoo re ka thetschang ha bobebe kateng le kamoo tumelo le ho mamela eleng tsona feela tse ka re sireletsang, le ha re fuoe thuto e ntle ho feta tsohle tse teng, joaloka ka Adama le Eva?**

## Ho Fumana Se Neng Se Lahlehile

Ha Adama le Eva ba khetha ho latela molaetsa oa noha, hara tse ling tsa litla-morao tse ngata, ba ile ba tobana le ho lelekoa ka phapusing ea Molimo ea ho rutela. Nahana ka se ileng sa lahlehela Adama le Eva ka lebaka la sebe sa bona. Ha re ka utloisisa ho oa ha bona, re ka utloisisa sepheo sa thuto bakeng sa rona mehleng ena betere. Ho sa natsoe ho lelekoa ha bona, bophelo lefatšeng le silafetseng bo ile ba tlisa sepheo se secha sa thuto.

Haeba thuto pele ho ho-oa e n'e e tsela ea Molimo ea ho tloaelana le Adama le Eva, ho ba ruta semelo sa hae, botle ba hae, le lerato la hae, joale kamora ho oa thuto e tlameha ho sebeletsa ho thusa motho ho tseba ntho tseo, le ho boela e bopa setšoantšo sa Molimo ka ho rona. Ho fapana le ho tlosoa botenng ba Molimo ka nama, bana ba Molimo ba ntse ba ka mo tseba, molemo oa hae, le lerato la hae. Ka thapelo, bosebeletsi le ho ithuta Lentsoe la hae, re ka atamela haufi le Molimo oa rona joaloka ha Adama le eva ba ne ba etsa Edeneng. Litaba tse monate ke hore ka lebaka la Jesu, le leano la topollo, ha se hore sohle se lahlehile. Re na le tšepo ea topollo le ho khutlisetsoa. Ka hona bohola ba thuto ea Bokreste bo tlameha ho supisa barutoana ho Jesu le seo a se entseng bakeng sa rona le ho khutlisetsoa hoo a re fang hona.

**Bala 2 Petrose 1:3–11. U shebile sohle se ileng sa lahleha ha batho ba tloha serapeng, litemana tsena li tlisa khotatso e kholo e bontšang hore se sengata se ka boelang se khutla hape. Petrose o re re lokela ho etsa eng hore re batlane le khutlisetso ea setšoantšo sa Molimo maphelong a rona?**

---



---



---

Ka Jesu, re fuoe “tsohle malebana le bophelo le bo-Molimo”. Tšepiso e kaakang! Tse ling tsa ntho tseo e kaba ke life? Ha honang, Petrose o re fa lethathamo la tsona: tumelo, kelello, tsebo, boitšoaro, mamello, joalo-joalo. Hape, hlokomela, tsebo ke e 'ngoe ea ntho tseo Petrose a li boelang. Ka hona, taba ena, e re isa tabeng ea thuto. Thuto ea 'nete e isa tsebong ea 'nete, tsebo ea Krete, 'me ka hona ha re na ho tšoana le eena feela, re ka boela ra arolelana tsebo eo re nang le eona ka eena le ba bang.

**Nahana motsotsoana ka taba ea hore sefate se neng se thibetsoe ho jeoa e ne e le sefate sa “tsebo ea botle le boboe.” See se lokela ho re bolella 'ng mabapi le hore na hobaneng tsebo e se tsebo eohle e ntle? Re tseba phapang ea tsebo e ntle le e mpe joang?**

## Ba Iphapanyetsang Ba Boholong

Batho ba bang ba nkuoa e le “barutoana ba tlhaho” ka phupusing ea ho rutela. Ha ho hlokehe hore ba bale ele hore ba pase. Lihloho tsa bona ke liponche tse monyang lithuto habonolo. Tsebo ea bona e bonahala e “tšoarella.” Petrose oa bobeli 1 le 2, leha ho le joalo, e totobatsa hore thuto ea ho Kreste e fana ka monyetla o lekanang ho ba tla ithukhubetsa. Mantsoe a khothatsang a 2 Petrose 1 a bapiseha le temoso e mahloko ho 2 Petrose 2.

**Bala 2 Petrose 2:1–17. Mantsoe a matla a khalemo ao aa sebelisang moo ke afe? Ka mokhoa o tšoanang, hara litemoso tsena tse matla-matla le khalemelo e matla, ke tšepo efe e kholo eo re e fuoang?**

---



---

Hlokomela seo Petrose a se ngolang temaneng ea 10 malebana le ba iphapanyetsang ba boholong. Ke khalemelo e matla ha kaakang malebana le seo eleng nnete le mehlang ea rona. Re le 'mele oa kereke re tlameha ho sebetsana le phapano ea maemo a itseng a boetapele (sheba Bahe. 13:7, 17, 24), re bitselitsoe ho hlonepha baetapele le ho ba mamela, bonyane ha feela ba ntse ba tšepahalla Molimo.

Leha ho le joalo, hara khalemelo ena e matla, Petrose o fana ka (temaneng ea 9) se khahlanong le sena. O re leha Molimo a na le matla a ho leleka ba khethang thetso, “Morena o tseba ho ntša ba lokileng litekong.” Na ho ka etsahala hore e be karolo ea thuto ea rona Bokresteng ha se ho qoba liteko feela empa le ho ithuta litsela tse ngata tseo Molimo a ka re pholosang ho tsona le ho re thusa ho itšireletsa khahlanong le tsona, o lemosa, ea tla “kenya ka sephiri lithuto tse khelohileng” (2 Petr. 2:1)? Hape, kaha ho tella ba boholong ho khalemelo ka matla, na thuto ea Bokreste ha e ea tlameha ho kenyeletsa ho ithuta tsela e nepahetseng ea ho utloisisa, ho ikokobetsa, le ho mamela “ba u okametseng” (Bahe. 13:7)? Leha motho u keke oa re Adama le Eva ha b'a ka ba mamela ba boholong, qetellong, ba khethile ho se mamele puso ea bona. 'Me se etsang tlole ea bona hore e be mpe ka ho fetisisa ke hore ba e ents'e e le ho arabela taolo e hlakileng ea se neng se batloa ke puso eo, eleng Molimo ka bo eena, o ne a ba boleletse, A ne a bile a ents'e joalo molemong oa bona.

**Tsepamisa maikutlo tabeng ena ea ba boholong haholo, eseng feel aka kerekeng kapa ka lapeng, empa bophelong ka kakaretso. Ke hobaneng ha bookameli, tsebeliso e nepahetseng ea matla le ho ithela tlasa eona ka nepo, ho le bohlokoa ha kale? Tlisa karabo ea hau ka sehlopheng ka Sabatha.**

## Ho Ithuta Haholoanyane:

“Bobeli bo halalelang e ne e se bana ba tlasa tlhokomelo ea ntate oa bona eo eleng morena Molimo empa barutoana ba fumanang likeletso ho tsoa ’Moping eo bohlale bohle bo ahetseng ho eena. Ba ne ba eteloa ke mangeloi, ba bile ba fuoe monyetla oa ho buisana le ’Mopi oa bona, ho se lesira la letho lipakeng. Ba ne ba tletse matla a tsoang sefateng sa bophelo, bohlale ba bona bo ne bo le ka tlasana ho ba manyeloi hanyenyane. Liphiri tsa tlholeho e bonahalang, ‘bohlale ba oona bo phethehileng’ (Jobo 37:16)—bo ne bo ba fa mohloli o sa cheng oa oa thabo le tsebo. Melao e tsamaisang tlhaho, eo ebileng khubu ea boithuto ba motho ka lilemo tse likete tse tšeletseng, e ne e buletsoe likelello tsa bona ke ’Mopi le ’Moloki oa tsohle tse teng. Ba ne ba buisana le lekhasi le palesa le sefate, ho tsona ba fumana makunutu a kamoo li phelang kateng. Sebopuoeng se seng le se seng se phelang, ho chesoang ke letsatsi, Adama o ne a li tseba hantle. O ne a file e ’ngoe le e ’ngoe lebitso, ’me o ne a tseba tlhaho le litloaelo tsa tsona kaofela. Khanya ea Molimo maholimong, mafatše a pharaletseng ka mepotoloho ea oona e hlophisehileng, ‘ho balensa maru,’ liphiri tsa khanya le molumo, tsa motšhare le bosiu-tsohle li ne li buleile bakeng sa boithuto ba batsoali ba rona ba pele. Lekhasing le leng le leng la moru kapa lejoeng le thabeng, naleling e ’ngoe le e ’ngoe e phatsiamng, mobung le le moeeng le sebakeng, ho ne ho ngotsoe lebitso la Molimo. Tlhophiseho le nyallano ea tlholeho li ne li ba bolella ka bohlale le matla tse se nang pheletso. Ba ne ba lutse ba tlatsa lipelo tsa bona ka lerato le tebileng e be ba tlaloa ke teboho.”—Ellen G. White, *Patriarchs and Prophets*, maq. 50, 51.

## Lipotso tsa Lipuisano:

1. Haeba Molimo o ne a reretse hore sekolo/mosebetsi e be monyetla oa hore batho ba kopane le eena le tlholeho ea hae, na re ntse re bolokile sepheo sa Molimo ka mesebetsi ea rona kajeno? Ke joang re ka tloaelanang le Molimo beterenyana ka mesebetsi ea rona (re lefshoa, thuto, re ithaopa, borumuoa, j.j)?
2. Ha re sheba boqhetseke ba Satane serapeng sa Edene, ho bonolo ho ferekanngoa ke mefokolo ea rona batho. Adama le Eva ba ne ba tseba hore Molimo o haufi, empa ba amohela ’nete ea noha e sa fellang ho ntse ho le joalo. Ke joang rona, ba hole le boteng ba Molimo, re ka nnang ra fumana matla a tsoang ho eena ho re thusa ho hlola meleko?
3. Buisanang ka taba ea ba boholong le hore na hobaneng ho le bohlokoa ho mamela. Ho etsahalang ha meeli ea ba boholong e sa hlaka? Bookameli bo ka sebelisoa hampe joang, ’me re arabela joang maamong ao?